

Archivo Nacional Aruba habri riba Dia di Betico cu exposicion “Nos Cunukeronan”



SABANABLANCO-Archivo Nacional Aruba ta participa na henter e comunidad Arubiano cu 25 di januari, Dia di Betico, tin e oportunidad pa bishita e exposicion “Nos Cunukeronan”, cu fin di aña pasa a keda habri.

Den e exposicion aki por aprecia diferente aspectonan di nos agricultura durante e ultimo siglo, combina cu fotonan y tambe atributonan relaciona cu trabou di nos cunucu. Tambe lo tin artefactonan pa aprecia cu tin di haber cu e bida di nos hendenan den antaño.

Tin documentonan interesante di e.o. plantacion di pinda te na construccion di damnan rond di 1900.

Tambe e parti di e industria di aloe lo wordo ilustra por medio di obhetonan, documento y potretan.

E exposicion aki a wordo stimula pa e trabounan cu tabata tin rond di e “Calender di Cunukeronan 2007” y cu a bira un dedicatorio na tur nos cunukeronan, tanto di antaño como esnan di awe.

Durante siglonan Aruba, apesar di su clima y tera seco,

tabata cultiva productonan di agricultura pa por a cria e poblacion Arubano. Na di dos lugar tabata cultiva tambe pa exportacion, manera ta e caso di aloe. E calender ainda ta disponible y lo ta na benta tambe diahuebs awor durante e exposicion.

E exposicion aki lo ta habri di 11 or di mainta y ta bai te cu 3 or di atardi. Archivo Nacional Aruba ta situa na Sabana Blanco 60, dilanti Aeropuerto Reina Beatrix (unda antes tabata WIMCO). Archivo Nacional hunto cu Fundacion Amigonan di Archivo ta extende un cordial invitacion na henter nos pueblo, especialmente esnan cu ta amante di nos cunucu pa bishita e exposicion aki.

Tambe nos kier a haci uzo di e oportunidad pa recorda tur scolnan cu durante siman di trabou tin oportunidad pa bishita e exposicion aki tambe. Si nos ta sugeri pa traha un Cita cu archivo pa asina ey por bishita e exposicion. Pa mas informacion por tuma contacto cu Archivo Nacional na telefon 583-4880, durante ora di trabou.

